



OTto Tiguri patre Heinricho senatorij ordinis uiro natus & educatus est, Anno circiter millesimo quingentesimo duodecimo. Is cum præ clara indole esset conspicuus, literarum fundamenta in patria fœliciter iecit, atque postea studiorum gratia sese ad Parisiensem, ac deinde Vuitebergensem Academiam contulit. Illis artibus & Philosophiæ magna diligentia operam dedit, atq; sua eruditione effecit, ut liberalium artium Magister crearetur. Postea circa annum millesimum quingentesimum tricesimum octauum Basileam uenit, & inter artiũ professores receptus fuit. In eo Gymnasio Ciceronem exposuit, atq; Herodiani Græcã Historiam enarrauit. quem etiam ipse ibidem bonos authores enarrantem audiui,

atq; publicè & priuatim præceptorem habui. Erat autem Otto ob intempestiua studia oculorum infirmitate detentus. itaq; me aliquoties ad se uocauit, atq; ipso ambulante quædam in Aristotele, Cicerone, Biblijs, aut alijs libris legere alta uoce iussit. Ipse interea ambulabat, atq; quandoq; ut cessarem iuebat, donec ea altius perpendisset. quæ quidem ipse eo tempore intelligere nequii. Nam in studijs ipse erat frequentissimus, qui legendo, scribendo, aut audiendo subinde suam eruditionem, nouarum rerum cognitione, accumulabat. Deinde Tigurum in patriã redijt, atq; philosophiam, præsertim Aristotelis Ethica & Politica, magna dexteritate enarrauit.